

La Rumantschia è sut squitsch da pliras varts

La Societad da minoritads en Svizra piglia posiziun

DA MARTIN CABALZAR

■ **La Societad da minoritads en Svizra è vegnida fundada 1982 da Sigi Feigel ed Alfred A. Häslar. Ella è politicamain e confessionalmain neutrala e s'engascha per vita, giustia, cultura ed integrazion da veglias e novas minoritads en Svizra. Da curt ha ella prendi posiziun davart la situaziun smanatschanta dal rumantsch ch'è actualmain sut squitsch da pliras varts, cunzunt era tras l'iniziativa «No Billag» che vegn en votaziun l'onn proxim.** Tenor l'iniziativa «Gea a l'aboliziun da las taxas da radio e televisiun» duain las taxas pajadas a la «Billag» vegnir stgassadas. Il comité d'iniziativa taxescha questas taxas sco contribuziuns sfurzadas che limiteschian la libertad da decisiun dal singul e da las interpresas. L'aboliziun da questas taxas duai distgargiar tuts e betg manar a grevazzas supplementaras, tenor il comité d'iniziativa.

La SSR procura per in servis public

Sco quai che la Societad da minoritads en Svizra constatescha procura la Societad svizra da radio e televisiun SRG/SSR per in «servis public». Ella ademplescha las finamiras da la Constituziun federala sco era las directivas dal messadi da cultura, s'engaschond per la coesiun da la societad. Sia activitad sa basa essenzialmain sin duas pitgas: sin la promoziun da las linguas nazionalas e la chapientscha vicedaivla tranter las cuminanze linguistics dad ina vart e la promoziun dal stgomi cultural da l'autra vart.

Consequenzas da l'iniziativa

Tant è tschert! Sche l'iniziativa vegn acceptada vegniss la purschida da radio e televisiun reducida radicalmain. Las unfrendas principalas da questa reduziun fissan cunzunt la Svizra franzosa, taliana e rumantscha.



L'iniziativa «No Billag» avess grevas consequenzas cunzunt era per la Svizra rumantscha.

KEYSTONE

Il cussegl federal renda attent en sia posiziun al rapport davart il servis public ch'è cumpari il zercladur. En quest rapport vegn el a la conclusiun che la Svizra dovra vinavant in purschida da radio e televisiun independenta cun ina purschida qualitativa cumparegliabla en tut las regiuns linguistics. Per cuntanscher questa finamira stoppian er ils meds finanzials correspundents vegnir mess a disposiziun.

La quadrilinguitad sco element essenzial da nossa Svizra

Tenor il messadi da cultura 2016–2020 duain il mantegniment da la quadrilin-

guitad sco element essenzial da la Svizra sco era la promoziun da la plurilinguitad individuala ed instituziunala en tut las regiuns linguistics esser activitads centralas da noss stadi. A partir da 2020 duai vegnir attribuì al rumantsch ina prioritad pli gronda.

«Duess l'iniziativa 'No Billag' u ina eventuala cuntraproposta menar ad ina reduziun da las taxas per la mesadad è il rumantsch smanatschà en sia existenza», accentuescha la Societad da minoritads en Svizra. En quest cas vegniss la purschida rumantscha stritgada dal program perquai ch'ella n'è betg pli finanziabla. La conseguenza fiss l'aboliziun dal Radio

Rumantsch e da la Televisiun Rumantscha.

Ultra d'ina reduziun considerabla da posts da lavur en il chantun decentral dal Grischun muntass quai er ina depauperisaziun deplorabla da la cuntrada da medias en la Svizra rumantscha.

Ulteriurs squitschs e novas sfidas

Ulteriurs svilups entaifer la Rumantschia documenteschan tenor la Societad da minoritads en Svizra in regress cunscient u incunscient.

Pir dacurt ha il Tribunal federal confermà la validitad d'ina iniziativa che pre-

tenda ina suletta lingua estra en la scola fundamentala e quai englais per ils Tudestgs e tudestg per ils Talians e Rumantschs. Scolars da lingua rumantscha e taliana èn gia oz en ina situaziun dischavantiada e quai tant sin il camp da la scola sco da la cultura.

Era la suletta gasetta rumantscha dal di è actualmain en difficultads finanziaras e ses avegnir è intschert.

Sco terz exempel enumerescha la Societad da minoritads en Svizra la decisiun da la Scola politecnica federala da Turitg che ha renunzià a la purschida da rumantsch perquai ch'ella ha giuditgà ils custs d'annualmain 100 000 francs per memia auts. Considerond l'entir budget da la Scola politecnica federala ina decisiun fitg dispaivla. Quai tant pli che la Scola politecnica federala è obligada da tgrir «las linguas nazionalas» e da promover la chapientscha per las valitas culturalas.

Svilups inquietants per la coesiun nazionala

La Societad da minoritads en Svizra è fermamain preoccupada ed avertischa dals svilups inquietants per la coesiun da la Svizra ed il respect vers las minoritads.

Cunzunt la Rumantschia vegn actualmain sut squitsch permanent da pliras varts. Quest squitsch è enorm per ina minoritad che vegn adina pli debbla ed è smanatschada en sia existenza. È la Svizra in summa anc pronta da sustegnair questa minoritad linguistica, sa dumonda la societad cun raschun. «U daventa il schurmetg per la quarta lingua nazionala adina dapli in bustab mort?», sa dumonda l'organisaziun numnada.

Per che quai na capitia betg appelle-scha la Societad per minoritads en Svizra al parlament federal ed a votantas e votants da s'engaschar vigurusamain per che l'iniziativa «No Billag» gaja da la glatscha giu.